

CBETA電子佛典集成

CBETA Chinese Electronic Tripitaka Collection
ebook

X58n1027

法界宗蓮花章

清續法集

中華電子佛典協會



目次

- [編輯說明](#)
- [章節目次](#)
- [卷目次](#)
 - 1.
- [贊助資訊](#)

編輯說明

- 本電子書以「CBETA 電子佛典集成 Version 2023.Q1」為資料來源。
- 漢字呈現以 Unicode 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 service@cbeta.org 回報。
- 版權所有，歡迎自由流通，但禁止營利使用。

森羅萬象。至空而極。百川眾派。至海而極。一切聖賢。至佛而極。一切教法。至圓而極。如來說經。華嚴而極。古德判釋。賢首而極。故今依彼教觀。開合五門百法。若非大經蓮花。無由取喻開悟。

初辨時。日出。花初開。影臨高水。色香始布。人蜂畢集。先照時也。一日昇。隨風開合不定。若食時。(辰也)色略淡。香漸微。影近低水。名為初轉。若亭午。遠望白。近看紅。影落深水。名為中轉。若晡時。(申也)色稍濃。香少重。影近高水。名為後轉。總成轉照時也二日沒。花將合。影還高水。色香如初。人蜂復集。還照時也三。

別時如此。通時云何。於一念間。色香光影。無不具足。與餘無異。名唯一念。一香氣色光。於三時中。一一遍周。隨心應量。名盡一化。二今日三時開合既爾。前(昨也)日後(明也)日三時亦然。名遍三際。(三)前日先照還照香光。與今日後日先照還照同。名攝同劫。(四)後日中轉香影光色。與前日今日初轉後轉同。名收異劫。(五)一念花果。不異前後日月歲時。前後日月歲時花果。不異今念。名念攝劫。(六)一念所攝前後時中。復有多念。彼多念中。復攝多時。名復重收。(七)此池既爾。彼池亦然。東土既爾。西域亦然。名異界時。(八)彼此東西所有劫念。互相攝入。重重無盡。名彼此攝。(九)即念即劫。非念非劫。以時無體。依花上立。花既融通。時亦無礙。名本收末(十)。

次敘儀。原種花為本。分移花為末。名色體同。上中下別。名本末差別。一從一本種。生開多花。名依本起末。(二)雖多支派。不離原種。名攝末歸本。(三)非本種。無以有眷屬隨生。非眷屬。無以顯根本原種。名本末無礙。(四)蓮開九品。色分四種。循業發現。寧有方所。名隨機不定。(五)互相見聞者名顯。不相見聞者名密。同一花上而成顯密。名顯密同時。(六)瓣鬚房實。同時具足。名一時頓演。(七)柔滋靜養。利益人蜂。名寂寞無言。(八)蓮成熟已。墮泥復生。如是展轉。三世不絕。名該通三際。(九)從一蓮花。轉生無量蓮花。從一池花。分開無數池花。名重重無盡(十)。

三約教。謂花從枝莖水土緣生。作生滅觀者。名小教。(一)識蓮花從藕生。作無性觀者。名始教。(二)知花從蓮實生。作緣起觀者。名終教。(三)了花從蓮肉中卷荷心生。作理實觀者。名頓教。(四)悟蓮花生長。則蓮實根莖。水土因緣。莫不備具。作圓融觀者。名圓教。(五)若約所詮法相喻者。初小教中諦緣。皮喻界內苦。肉喻界內集。泥喻界外集。水喻界外苦。芽鑽皮破。喻界內滅。芽鑽肉破。喻界內道。芽出泥上。喻界外道。芽出水面。喻界外滅。一皮肉泥草。重覆於上。喻無明緣。有能生力。喻行緣。內含卷荷。花果畢備。喻識名色入觸受。含潤。喻愛取有。團圓盤屈。不能得出。喻生老死。芽鋒萌動。鑽皮肉破。喻無明滅。不復還在皮肉內生。喻行滅。根莖花果。出皮泥外。喻識名色入觸受滅。潤澤雨露。喻愛取有滅。出在水面。開合自如。喻生老死滅。(三)次始教。相宗。執蓮花為實有。遍計性也。了達依他假有。依他性也。蓮實未隨緣已前。及花落蓮墮已後。本無花果生滅諸相。圓成性也。(三)空宗。葉隨風雨飄灑。花隨蜂蝶翔集。我空也。藕莖房子。皆空無實。法空也。中空外實。離有離無。真空也。(四)三終教。蓮子。本覺也。(五)下泥池。出泥水。位當十信。名名字覺。處空欲敷。十住。鬚臺可識。十行。向日開迴。十向。名相似覺。敷舒成就。荷負蜂蝶。十地。鬚葉將落。蓮房當獨。等覺。名隨分覺。皆始覺也。(六)花瓣謝盡。臺子獨在。究竟覺也。(七)四頓教。蓮子內有緣生性。自覺智也。蓮子內有不變性。自覺境也。(八)五圓教。蓮房根莖。事法界也。(九)中間孔空。理法界也。(二)內空外有。一如無礙。理事無礙法界也。(三)藕葉子鬚。同時容遍。事事無礙法界也。(四)根子華葉。利益人蜂。施度也。(一)香氣遍布。無諸染污。戒度也。(二)生泥池不為辱。忍度也。(三)唯增長而無退。進度也。(四)靜住無為。養成柔順。禪度也。(五)日出華開。日暮華合。慧度也。(六)隨風水緣。東昂西倒。南涌北沒。便度也。(七)為蓮故花。枝擎葉蓋。鬚遶房圍。願度也。(八)若藕若子。皆有能生作用。力度也。(九)無量色光。彼此相映輝赫。智度也(十)。

四顯宗。我有無數種色蓮花。名我法俱有。(一)無數蓮花。非我獨有。名法有我無。(二)唯現在見。過未不知。名法無去來。(三)體相是真。名影是妄。名現通假實。(四)花體相假。子體相真。名俗妄真實。(五)花果皆屬有名無體。名諸法但名。(六)以上六門。皆喻小乘隨相法執宗也。若花若果。皆從藕生。此相不無。名為唯識法相。(七)此根此莖。雖有外相。實無內體。名為真空無相。(八)藕花依他蓮實法生。蓮實隨諸緣起無礙。名為藏心緣起。(九)蓮實從內卷荷心生。卷荷生性。本無生滅。名為真性寂滅。(十)卷荷心性。本唯一真。離生離滅。理實法界也。卷荷心相。根莖花果。一一備

具。緣起法界也。性亦容遍。相亦容遍。即今所生根葉花果。亦皆容遍。主伴重重。名為圓融法界也(十一)。

五明觀。花果未生前。已滅後。絕無其相。即現在時。念念遷謝。空無自性。名為真空絕相。(一)雖無其性。不妨有相。非空非有。而空而有。名為理事無礙。(二)根葉花果皆稱法界。法界攝入。重重無盡。根等亦皆攝入無盡。名為周遍含容。(三)蓮子在泥池發芽鑽肉。名地獄法界。瞋知見如黛蓮。(一)出皮。名餓鬼法界。貪知見如綠蓮。(二)鑽泥。名畜生法界。癡知見如碧蓮。(三)齊泥。名脩羅法界。慢知見如黃蓮。(四)出泥在水。名人法界。戒知見如白蓮。(五)處水增長。名天法界。定知見如紅蓮。(六)齊水面。名聲聞法界。諦知見如紫蓮。(七)出水面。名辟支法界。緣知見如赤蓮。(八)處在空中。名菩薩法界。度知見如青蓮。(九)纔出池初半分。始也。終至池面。終也。倏透池頂。頓也。直出池上。圓滿將敷。圓也。向日開迴。名佛法界。覺知見如金蓮。(十)花藥初開。小教。花泛蓮現。圓教。下風則合。空教。上風則開。相教。日沒華合。頓教。(宗通故)日出花開。終教。(說通故)望天日上開。人天歡樂。一乘義也。對池水下開。魚鰕被蔭。二乘義也。不上不下。迎風而開。禽鳥往來。蜂蝶採戲。三乘義也。以上名教義對。(一)藕莖花鬚房實。事也。花鬚則外空。房實則內空。理也。通名理事對。(二)蓮實性無生滅。境也。卷荷心隨緣轉。智也。是境智對。(三)芽根枝葉花果。皆有生力。行也。植種。發生。增長。成熟。脫落。五等階降。位也。是行位對。(四)蓮花。因也。蓮實。果也。即因果對。(五)蓮房。依也。蓮子。正也。蓮皮。依也。蓮肉。正也。蓮池。依也。蓮花。正也。即依正對。(六)皆以四微八法為質。體也。而有生長開泛幹能。用也。即體用對。(七)能隨日開合。能隨風俯仰。能擎雨翻珠。能覆池現影。皆人也。所具白藕青枝。紅花綠葉。黃鬚紫瓣。粉肉烏皮。皆法也。即人法對。(八)好華影。好珠。好蓮實。好藕。皆順也。不好花影。不好珠。不好蓮實。不好藕。皆逆也。名逆順對。(九)好不好花葉藕實珠影。應也。好不好風日雨水泥池。感也。如菱花隨烈日。影臨濁水。黃葉隨狂風。珠灑暴雨。沙藕移瘠池。細子墮羸泥。逆應感也。鮮花隨皓日。影臨淨水。綠葉隨和風。珠灑甘雨。粉藕移肥池。大子墮美泥。順應感也。名感應對。(十)花鬚因。蓮臺果。同時具足。名同時具足相應門。(一)藥狹花廣。花廣果狹。瓣廣鬚狹。房廣子狹。無礙自在。名廣狹自在無礙門。(二)蓮臺一。鬚瓣多。華瓣一。蓮鬚多。蓮房一。子實多。名一多相容不同門。(三)臺在內。鬚居中。瓣繞外。若云蓮花。臺鬚即瓣。若云蓮房。鬚瓣即臺。名諸法相即自在門。(四)藥時隱。花時顯。葉瓣顯。鬚臺隱。蓮房顯。蓮子隱。開時

顯。合時隱。綻時顯。謝時隱。名祕密隱顯俱成門。(五)一子帶多子入一房。子子皆然。一臺帶多子入多鬚。一鬚帶一房多鬚入一葉。鬚鬚皆然。一葉帶多鬚葉入一蓮臺。葉葉皆然。一房帶多鬚瓣入多子等。房房皆然。如是相望。重重無盡。名因陀羅網境界門。(六)花內含鬚臺。臺內藏多子。子內具諸根莖花果。名微細相容安立門。(七)見一葉一鬚一子。即是見於多葉多鬚多子。見一花。即是見鬚臺。見房空。即是見子空。名托事顯法生解門。(八)自結藥至果熟。晝夜增長。日月積累。雖多時節。不離當念。名十世隔法異成門。(九)荷花因。蓮實果。成三句。一因主因伴。隨一花葉為主。餘多鬚葉為伴。二果主果伴。隨一子實為主。餘多臺子為伴。三果主因伴。一蓮房為主。餘多花瓣為伴。彼此相望。主伴重重。名主伴圓明具德門。(十)蓮花具含葉鬚臺實。名總相。一葉鬚臺實。非即是花。名別相。(二)臺瓣鬚等。同成一花。名同相。(三)蓮臺非鬚瓣等。名異相。(四)一花攬諸鬚瓣臺等緣成。名成相。(五)鬚瓣臺等。各居自位。名壞相。(六)一花十玄六相既爾。若望多花。及餘根莖葉等。十玄六相亦然。蓮花喻爾。餘喻例知。法法時儀。塵塵教觀。可謂敷宗乘於六根之前。布聲光於萬化之域。後之覽者。宜三復焉。

(十時。十儀。十界。十對。十玄。十度。共六十。四法界。六相。成七十。三時。三覺。三觀。十一宗。共九十。五教各開為五。四諦因緣。三性。三空。二自覺。總合為五。即成百法門也。若以三覺中始覺三位。及諦緣性空覺五門。並悉開之。便成一百二十重法喻也)。

[CBETA 贊助資訊](#)

[.https://www.cbeta.org/donation/index.php](https://www.cbeta.org/donation/index.php)

自 2001 年 2 月 1 日起，CBETA 帳務由「財團法人西蓮教育基金會」承辦，並成立「財團法人西蓮教育基金會」－ CBETA 專戶，所有捐款至 CBETA 專戶皆為專款專用，歡迎各界捐款贊助。

您的捐款本協會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

信用卡線上捐款

本線上捐款與聯合信用卡中心合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

[前往捐款](#)

信用卡（單次 / 定期定額）捐款

本授權書可提供單次捐款或定期定額捐款之用途。

請於下載並填妥捐款授權書後，請傳真至 02-2383-0649，並請來電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 [授權書](#) (MS Word 格式)

劃撥捐款

郵政劃撥帳號: 1 9 5 3 8 8 1 1

戶名: 財團法人西蓮教育基金會

欲指定特殊用途者, 請特別註明, 我們會專款專用。

線上信用卡 / PayPal 捐款

PayPal 是一個跨國線上付款機制的公司, CBETA 引用其服務, 提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project .

相關收據開立事宜, 由於付款幣別為美元, 我們除了會依您所贊助之美元金額開立收據外, 另我們會依捐款當日公告匯率開立台幣收據, 此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

[線上信用卡 / PayPal 贊助](#)

支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex- cheques, remittance, etc.,) please entitle to "The Seeland Education Foundation".
